

















REPLIQUE
POUR LE CATHOLI-
QUE ANGLOIS, CON-
tre le Catholique associé
des huguenots.



D. M. LXXXVIII.

Case
F

39

.326

15880

THE NEWBERRY
LIBRARY

REPLIQUE POVR LE
CATHOLIQUE ANGLOIS,
contre le Catholique associé des
huguenots.



Depuis le temps que
nostre Roy a cognu
que les Edicts de pa-
cification faits par cy
deuant, n'auoient a-
mené rien moins que
la pacification en ce
Royaume, & que par
son Edict dernier il les a reuoquez, en ioi-
gnant à ceux de la pretendue religion de
vuider des pays de son obeissance. Lesquels
au lieu d'obeyr à leur Prince, se sont mis en
armes & ont fait descēdre en ce Royaume
vn nombre effrené de Reistres, Lásquenets
& Allemans, pour rauager & destruire les
subiets du Roy, de façon qu'ils fussent con-
trains de demāder au Roy le restablissēmēt
des Edicts de pacification, & contraindre
nostre Prince de leur accorder beaucoup
plus qu'il ne leur estoit permis parauant.

Replique pour le

Ceux qui ne sont en armes cōme leurs as-
sociez se mettent à escrire & publier des li-
ures pleins de calōnies contre les seigneurs
qui font seruice à leur Roy, & y employēt
leurs biens & leurs personnes, & ces mesdi-
sans ne s'osans directement adresser au
Roy, se desgorgent contre ceux que le Roy
employe à la deffence de nostre patrie. Et
pource quelques Catholiques biē affectiō-
nez se sentās prouoquez par ces libelles dif-
famatoires, leur ont respōdu par escrit. En-
tre les antres vn qui se dit Catholique An-
glois, nō peut estre qu'il soit de natiō: mais
qu'il est si ferme en sa religiō, que cōme les
Catholiques Anglois s'exposent tous les
iours au mattyre soubz leur Royne qui les
tyrānise & les fait mourir de diuers suppli-
ces. Ce personnage zelé en la foy a fait vn
aduertissement à noz François pour se dō-
ner de garde de tomber és mains d'vn Roy
heretique, qui leur fait le mesme traitemēt
que l'ō fait aux Catholiques Anglois, liure
qui a esté si bien receu que l'on l'a imprimé
pour la quinziēme fois, & traduit en lāgue
Latine tant il a esté plausible. Cōtre lequel
ces iours cy s'est imprimée vne responce
pleine de modestie: mais aussi pleine d'a-
stuce: car celuy qui l'a faite se dit Catholi-
que, affin que n'estant descouuert estre de .

la religiō huguenotte, nous n'eussions à fermer noz oreilles à ses ptopos emmiellez, qui semble de prime face deffēdre vne bōne cause fondee en la charité fraternelle, & telle que nous cōmande Dieu par son Euāgile, detestant toute cruauté, contraire à vn Chrestien, & nous persuadant auoir nostre recours par larmes, non par les armes, par prieres à Dieu, non par guerres ciuiles, qui à la verité nous apportēt des maux infiniz, & confirme ses raisons avec tant & tāt d'authoritez, qu'il ne laisse rien derriere. Mais pour ce que ce liure est captieux, d'autant qu'il porte sur le frōt vne douceur, vne misericorde qui nous est tant recommandee enuers nostre prochain. I'ay biē voulu ietter en auant ceste respōce, non pour le Catholique Anglois, qui est trop plus que suffisant pour se deffēdre: mais pour soustenir la cause commune de la foy dont nous faisons profession, cependant que peut estre il ne sera aduerty du liure qui a esté fait cōtre luy. Or si l'autheur de ceste responce est de la pretenduē religiō: certes il a occasion de soustenir par viues raisons qu'il n'est pas bō ny salutaire de punir de mort l'heretique, & si il disoit du cōtraire il se feroit tort: Mais allez faire confesser à vn volleur qu'il ne

Replique pour le

faut pas mettre sur la touë les volleurs. Or
fil est Catholique comme il dit, ie ne puis
cōprendre cōme il soit si temeraire de con-
damner le Pape de Rome son pasteur, au-
quel il doit toute obeyssāce, lequel toutes-
fois il reprēd d'auoir declaré le Roy de Na-
uarre & le Prince de Condé heretiques, re-
laps & excommuniez.. Vray est que depuis
quelques annees, lescaluinistes se diēt croi-
re l'Eglise Catholique & Apostolique, &
quand cevient à dire la Romaine, ils dient
la Romaine aussi cōme elle estoit du temps
des Apostres, tellemēt que nous qui souliōs
par vn priuilege special nous dire Catholi-
ques à la differēce des heretiques, nous n'a-
uons plus que la foy Catholique de nostre
costé, quand au nom il est vsurpé par les he-
retiques: Et de fait tous ceux qui ont escrit
cōtre la ligue des Catholiques, se qualifiēt
Catholiques, & deniēt neantmoins que le
Roy de Nauarre soit heretique: puis qu'il
croit le vieil & le nouveau Testament, &
tient le Symbole des Apostres. Mais si ainsi
est, n'y a il Arrien, Nestorien, Pelagiē, Tri-
nitaire & autre, qui soit condamné par les
Conciles de l'Eglise qui ne soit Chrestien
Catholique, veu qu'ils fōt estat de croire la
Bible, l'alleguent pour le soustenement de

reurs opinions, & s'en aident ainsi que feit le diable lors qu'il tenta nostre Seigneur, auquel il proposa quelques textes de l'Escrirure sainte pour le cōfondre, & luy persuader qu'il se deuoit precipiter du haut du Temple en bas. Or cest autheur en tout son discours ne tend qu'à vn point, qui est de prouuer qu'on ne doit punir l'heretique, mais l'adopter cōme enfant naturel de l'Eglise, le familiariser & l'embrasser comme croyant en Dieu. Toutesfois le Concile de Constance condamna Iean Hus & Vviclef d'estre bruslez, pource qu'ils estoient heretiques, tenās quasi toutes les propositiōs qu'a tenu Luther. Et noz Rois ont par l'autorité des Parlemens de ce Royaume fait brusles vifs les Lutheriens & Caluinistes, il est bien vray qu'estans les heretiques multipliez en nombre infiny de nostre temps, on a voulu essayer à les gagner & vaincre par douceur: relachant de la seuerité des iugemens precedēs. Mais tant s'en faut que cela ayt seruy au cōtraire si tost quil fut permis par les Edicts de pacification de faire exercice libre de leur religion, aussi tost l'on veit que pour cent qu'ils estoient, ils furent dix mille, & de fait nous vismes en la ville de Paris si grand nombre de huguenots aller à

Replique pour le

la presche, que ceux qui restoiēt allans à la Messe ne paroïssioient rien aupres d'eux. Et quād les Ministres eurent cōgé de prescher, incontinent ils meirent les armes és mains des subiets du Roy, & les feirent rebelles à leur Prince, eux qui auparauant auoiēt esté si loyaux & fidelles: mais si tost que les presches furent deffendues en la ville de Paris, aussi tout le peuple reuint à la Messe & reprit sa premiere deuotion quil a tousiours depuis cōtinuee & cōtinue encores à present, sans qu'un seul de tous se declare huguenot. Voila que c'est du peuple qui se ränge volōtiers où il voit les grands se ranger, que si la presche eust eu cours, ie croy qu'au-iourd'huy il n'y auroit vn seul Catholique. Ce n'est donc sans cause que nostre Roy voyant qu'ō auoit abuzé de la minorité des Rois ses freres & de la sienne, leur faisant authōriser par leurs Edicts, l'heresie que Dieu deteste & abhorre sur toute chose, & que le remede que l'on y pésoit mettre regregeoit la maladie, s'est condescendu de reuoquer ses Edicts de pacification, nō que pour cela il condamne à la mort les heretiques mal sentans de la foy: mais il s'est contenté d'une peine plus douce: c'est qu'ils vuideroient son Royaume, & puis dire que
l'exil

l'exil n'est point tant vn supplice, comme vn refuge, ainsi que Ciceron tesmoigne en son oraison pour Cecinna, & Cesar en l'oraison qu'il feit sur la coniuration de Catilina dans Saluste, auquel exil les personnes ont leur refuge comme à vn autel pour eschapper la peine de mort. Les Grecs en vsoient de mesme, ce qui est monstré des vers d'Homere recitez par le Iurisconsulte à l'exemple de la loy de Moysc, qui par le commandemēt de Dieu auoit estably quatre villes pour lieux de seureté & aziles à ceux qui auoient commis homicide par cas fortuit & non de guer à pend. Tellement que nostre Roy les ayant traictez si doucement, que se cōtenter qu'ils vuidassent son Royaume sans les faire brusler vifs, comme ses predecesseurs souloient faire, ils se deuoient contenir & ne prendre les armes pour mettre tout en combustion, & ceux qui escriuent ne deussent controoller les actions de nostre Roy, qui de sa propre bouche pronōça son Ediēt luy seāt en son son throsne & lit de iustice estār en sa Cour de Parlement, laquelle loüa la saincte intention du Roy, qui reprenoit l'ancienne deuise de la ville de Paris, capitale de ce Royaume. Vn Dieu, vn Roy, vne loy, vne

*l. aut facti
d. plenis.*

Replique pour le

foy, & dont le peuple de Paris cria par les rues viue le Roy: tesmoignant l'aïse & le contentement qu'il en auoit.

Puis donc que l'Edict est publié, c'est vn sacrilege de reuocquer en doute s'il est iuste, & deuroit on pratiquer la loy qui fut en Grece. Que si quelqu'un vouloit faire abroger vne loy, il se soubmisit au cas qu'il ne fust trouué auoir cause raisonnable de ce faire, d'estre pendu & estranglé. Sainct Augustin au liure de la vraye religion, dit qu'il faut disputer de la loy quand on la veut publier: mais apres qu'elle est publier, il faut viure selon icelle.

Or pour ce que le Catholique Anglois. soustient la cause des Princes qui ont suscité la liguë faicte pour l'extirpation des heretiques, lesquels ceux de la religion pretendue ont denigré de toutes les iniures & conuices qu'ils ont peu, ausquels il a respondu comme se sentant le tort qu'on leur faisoit, & qu'il fait ce qu'il peut pour nous desgouster de receuoir vn Roy heretique en ce Royaume, respondant aux calomnies que l'on a dictes par cy deuant par liurets imprimez & publiez. Cest autheur le taxe de n'estre point modeste, mais qu'il se preigne à ceux qui ont escript les inuesti-

ues pleines de conuices & de mesdisances, ausquelles cest Anglois respondoit, & de-
posans route passion desmesuree, parlons
ouuertement & à la Françoisse de la que-
stion que vous debattez sans entrer en pic-
ques & iniures, en quoy l'on congnoist la
maladie de noz esprits.

Dés le cōmencemēt de vostre discours vo-
le reprenez d'un mot qu'il a dit, c'est que la
maladie où nous sommes se deuoit guerir
par vne seignee, & demander s'il a opinion
que l'heresie soit au sang de l'homme, & de
quelle veine il le faut seigner. Mais prenez
son dire de la main dextre, non de la gau-
che, ainsi que disoit vn Philosophe, il vous
dit que la France en general est malade, &
qu'en ce grand corps il y a des membres
sains, les autres gastez & mistionnez, c'est à
dire des personnes Catholiques, les autres
heretiques, qu'il faut retrancher les mau-
uais d'auec les bons, de peur que la conta-
giō ne gaste & corrompe le surplus de ceux
qui sont Catholiques. Ce n'est point vne
comparaison nouuelle, mais pratiquée par
l'escriture sainte, par les Poëtes mesmes,
& tous bons aùtheurs qui comparent vne
Republicques à vn corps, ainsi qu'Agripa
fait entendre aux Romains quand il les

Replique pour le

voulut reconcilier les vns aux autres. Mais ie croy que vous sçauetz mieux que ne di-
etes & que n'estimez point nostre Anglois
si ignorât qu'il entende cruëment qu'il faille
guerir vne personne heretique en luy ti-
rant vne poislette de sang. Ce qu'il a dit, il
l'a appris de saint Hierosme l'un des qua-
tre Docteurs de l'Eglise, disant ainsi, faut
resequer & retrâcher les parties de la chair
qui sont pourries, & la brebis galeuse se
doit separer de la bergerie, que la masse en-
tiere de la maison & les autres brebis ne
perissent, soient corrompuës & pourries.

Arrius en Alexandrie fust vne petite scin-
tille. Mais pource qu'elle ne fust pas estouf-
fee & esteinte du commencement, son he-
resie a infecté tout l'vniuers. L'Eglise ap-
prouât son dire, a inferé l'autorité de ce
saint personnage entre les Canons du De-
cret. Si donc nostre Anglois, conduisant ses
pas sur les vestiges de ce bon Docteur, a fait
chose à reprendre, ie diray pour luy avec
Varro, que bien sentir contre l'opinion de
tous est estre fol, & qu'il vaut mieux faillir
avec toute l'Eglise, que bien dire avec
vous : ainsi que disoit l'un des Peres de l'E-
glise, qui est saint Augustin, Vous vous
trauaillez merueilleusement à rechercher

toutes les loix des Empereurs escrites aux Codes Theodosië & Iustinië, pour môstrer que tous n'ont esté d'aduis de punir les heretiques de mort. Mais les Parlemens de ce Royaume ont tant disputé de ceste maniere de question, & ont trouué que les loix se doiuent quelquesfois roidir, quelquesfois relascher, selon l'occurréce des cas & comme il est dit *Multis grassantibus*, & croy que Messieurs de la Cour ont appris par l'histoire des Empereurs que vous alleguez, que la douceur dont ils ont vſé par leurs Edicts a donné cours à l'heresie, qui a pululé pour n'estre retrainte, ainsi que le feu ſil n'est tost estaint, gaigne de maison en maison, & en fin brulle & consomme toute vne ville. Sainct Augustin escriuant à Boniface de la correction des Donatistes, dit: Le Medecin est odieux au malade phrenetique, & le pere à son fils desbauché, celuy là en faisant garroter son malade, cestui-cy en corrigeant son fils, mais tous deux en les aymant. Que ſils les negligent & souffrent qu'ils perissent, ceste fauce clemence est plustost vne cruauté qu'une misericorde. Et en vn autre passage dit: Vous vous rendez coupables si vous permettez qu'à

*De cōmun
vita Cleri-
corum.*

Replique pour le

*Epist. 64.
Ad Epist.
ad Corinth*

Ap. 13.

*Super Can-
tica c. 2.*

• Cōnation, & ailleurs il dit: Cōme quelque-
fois c'est misericorde de chastier, c'est aussi
cruauté de pardonner. S. Ambroise dit que
le peché d'un qui est cognu s'il n'est corrigé
en contamine beaucoup, voire tous ceux
qui en ont cognoissance: car ils ne croient
pas que ce soit peché, quand il n'est point
chastie. Sainct Hierosime escriuant à Vipe-
ri^o dit: L'austerité de Phinees, le zeile d'He-
lie, la seuerité de saint Pierre quand il feist
mourir Ananias & Saphira, la constance de
saint Paul qui rendit au eugle Elimas le
Magicien: tous ceux là n'ont point vsé de
cruauté, mais de pieté enuers Dieu, allegāt
le Deuteronomie, Si ton frere, ton amy & ta
femme que tu gardes en ton sein te veullēt
desbaucher de la foy, fais les mourir, coup-
pes leur la gorge & tu feras sacrifice à Dieu.
Sainct Gregoire en son registre dit. Qui
ne corrige point ce qu'il faut retrācher, cō-
me le mesme pecheur doit porter la coulpe
du peché, pour negliger ce qu'il deust cor-
riger: puis il dit, il est bien plus expedient
qu'un seul patisse pour le salut de plusieurs
que pour sauueur un seul, vne infinité de
gens patissent. Voyla l'autorité des qua-
tre Docteurs de l'Eglise. Sainct Bernard de
mesme ne craignez point (dit-il) faire cho-

se contre la charité, si le scandale d'un seul homme est pour vous recompensé du repos & de la paix de plusieurs, car il est meilleur qu'un perisse que l'unité. Sainct Iean Chrysostome dit. Quand les pecheurs ne sont point retranchez ils se multiplient & pechent par impunité. Pource qu'Absalon ne fust puny d'auoir tué son frere, il machina la mort de son propre pere. Origene dit quand les Prestres pardonnent à un homme, ils coniurent la ruine de toute l'Eglise: mais quelle bonté est-ce, quelle misericorde, pardonner à un pour mettre tous les autres en danger: car le peuple est pollué par un seul pecheur, ainsi que d'une ouaille galeuse tout le troupeau est infecté. Je n'aurois iamais fait si ie uoulois icy amener toutes les authoritez de noz peres qui ont esté d'aduis de punir les pecheurs. Vous me direz ils ne parlent pas des heretiques, mais ie vous demande en consciéce si vous en auez, les heretiques ne sont ils pas pecheurs & plus dangereux beaucoup que ceux qui commettent d'autres pechez, car une heresie se baille de main en main, & ressembble au chancre qui gaigne peu à peu s'il n'est retranché du corps où il est engendré, & puis que l'heresie est tenue pour crime de leze Maiesté

Replique pour le

djuine, faut-il la laisser impunie par les loix qui punissent si griefuement le crime de la Maiefté humaine? Vous direz ce que disoit Tibere *deorum iniurias diis esse curæ*, ou cōme noz Iurifconsultes *satis Deum ultorem habet* & lairrez l'iniure faite à Dieu sans punitiō: mais quand il n'iroit que du salut de nostre prochain qui est peruertey, nostre Seigneur nous a tant recommandé la conuerfion des pecheurs, disant à ses Apostres, qu'il les feroit pecheurs des hōmes. Que diriezvous si en l'hostel dieu de ceste Ville vous voyez q̃ l'on meist les pestiferez pelle messe avec les autres malades, diriez vous pas que c'est cruauté? si l'ō mettoit les hōmes sains avec les griefuement malades de fièvres & d'autres maladies cōtagieuses? quand l'on a vne dent pourrie en la bouche on l'a fait arracher, de peur qu'elle ne corrompe les autres qui sont entieres, nostre Seigneur qui est la douceur mesme dit. Si ton œil te scandalise arrache le & le iette hors de toy, si c'est ton pied fais le couper, & puis vous voulez que nostre Roy qui est nostre pasteur mette les heretiques avec les Catholiques, & face ainsi que faisoit vn tyran à ceux qu'il vouloit faire mourir qui attachoit vn hōme vif avec vn corps mort, afin que la pour-
nriture

riture de l'un corrompist l'autre. Vous ne voudriez pas en vostre grenier souffrir vne pomme pourrie d'as le tas de voz pommes, de peur qu'elle ne gastaft celles qui sont entieres, & vous nous voulez persuader qu'il faut mettre les heretiques avec les Catholiques, qui ne cesserot de disputer de la religion, reprendre & se mocquer de la nostre, cathechiser & instruire ceux qui ne font des leurs & leur fournir des liures censurez pour les peruertir: vous pensez estre plus sages que noz peres, que noz Roys & que nos Cours de Parlement, & sil est ainsi que vostre opinion doiue estre receue en France, que ne persuades vous à ceux d'Angleterre de souffrir l'exercice de la religion des Catholiques, que n'en dites vous autant à ceux de Geneue, qui ne voudroient pas recevoir vn qui fust Lutherien ou Papiste, & qui ont fait brusler Seruet pour auoir este Trinitaire. Ie trouue estrange comme vous vous traueillés tant à nous prescher la misericorde, que vous n'escrives à la Royne d'Angleterre vos bonnes raisons pour la diuertir de martyriser les Catholiques Anglois, ie ne doute point que n'y ayés du credit. faites nous ie vous prie ceste ceuvre de commiseration & en recompense: nous

Replique pour le

supplions le Roy de moderer son Edict contre les huguenots vos cliens, pour lesquels vous aduocassez si pertinemment: mais sans aller plus auant, que n'allés vous au deuant des Reistres, Lansquenets & Suisses, qui descendent en ce Royaume, avec tant de pistoles, harquebuses, piques & artilleries pour planter leur religion, & leur proposez vos bônes raisons, leur donnant à entendre que la foy ne se plante par les armes canonieres & sulfurees: mais vous vous en excuserés, disant que vous ne parlés pas bon Allemand, & qu'ils n'entendroiet pas vostre langage, laissez nous donc nous reuencher contr'eux, & ne beibauchés point ceux qui nous veulent aider & s'opposer à leurs forces: mais vous faiêtes comme ces femmes importunes quand on frappe leurs maris, elles les embrassent & tiennent serrés comme pour les couvrir, & leur nuisent plus qu'elles ne leur profitent: ce pendant qu'ils sont à forcer nostre pays, où ils saccagent, ruinent & depeuplent tout, vous nous preschés la patience de Iob, & nous tenés les mains, nous exhortans de nous aider de nos larmes & de nos prieres seulement: mais frere Iean des Antomures vous dira qu'il n'est saison de chanter, &

qu'il faut prédre le baston de la croix pour deffendre le clos de la vigne. Je croy qu'il nous feroit bon veoir d'aller au deuant des Reistres avec les larmes auxyeux, les mains iointes, avec la croix & la banniere, psalmodians, ie ne sçay s'ils nous feroiēt aussi bon party que feist Atila au Pape de Rome, qui fut au deuant de luy, mais ie ne m'y voudrois pas fier, ie croy qu'ils sont encores plus cruels que ce Barbare. Vos remōstrances sont belles à faire, lors que l'on delibere de la guerre, & feroient bien seantes à quelque deuot Capuchin, qui nous prescheroit le martyre pour ensuiure nostre Chef qui a souffert pour nous, ie le prédrois de bonne part venant de luy : Mais ie crains bien que ce pendant que les huguenots dont vous estes si bon Aduocat, nous font la guerre à enseignes desployees, vous nous vouliēs lier les bras & les iambes comme feist Dalila à Samson quand il dormoit, à fin d'estre mis es mains des Philisthins : Ce sont belles armes que les larmes & les prieres pour adoucir l'ire de Dieu, ie le confesse : mais nostre Roy est nostre Chef pour nous deffendre de l'incursion des ennemis, & la Noblesse qui a tousiours l'espée au costé, est tenuē de l'assister & s'aider des armes, quand par les

Replique pour le

armes nous sommes assailliz, car que leur-
fert de porter vne espee à leur costé, si ce
n'est pour deffendre leur patrie, au besoing
où nous sommes: pour qui combattre la re-
seruent-ils? est-ce pour combattre Karefine
prenant, ie le dis pour vous qui vous dictes
estre homme d'espee, vous estes volontiers
de longue robe pendant la guerre, & d'es-
pee lors que nous sommes en paix, & puis
vous serez armé, mais ce sera en peinture
lors que serez mort, voz armes sont tim-
brees d'un armet, mais c'est pour vn espou-
uentail de chaneuières, vous estes vn grand
profsneur de nous prescher les larmes quand
il faut manier les mains, dites cela aux fem-
mes & aux moines, non à la Noblesse de
France qui veoit rauager ses subiets par des
barbouillees de Reistres qui deuorent tout.
Aussi nostre Roy & les Princes de ce Royau-
me ne sont deliberez de rengainer leurs es-
pees & pendre leurs armes au croc, pendant
que ces estrangers tiennent la campagne &
laissent les lieux par où ils ont passé comme
si le feu y auoit esté. Quand nostre Roy fera
en pleine paix, il reprendra & le sac & la
cendre de penitence pour appaiser Dieu
comme faisoit ce bon Roy Dauid qui estoit
vaillant en guerre s'il en fust iamais, & de-

not en la paix. Vostre liure est fort hors de
saison, & comme dit Tacite, *intempestiva est
tua sapientia*, rengainez vostre harangue en
vn temps plus commode, vous sçauiez que
les Romains appelloient vn homme ine-
pte, quand il disoit chose qui n'estoit de sai-
son. Mais c'est assez dissimulé, ie vous prie
lèuez ce masque de dessus vostre visage &
parlez ouuertement: pourquoy prenez vous
le nom de Catholique, sinon pour mieux
nous deceuoir, estes vous point de ceux
dont il est parlé en l'Euangile, quand il est
dit: Les faux Prophetes viendront en ha-
bits de brebis pour entrer en la bergerie, &
seduire mon peuple: car si vous y veniez en
vostre habit de loup, les chiens du troupeau
vous halleroient bien, vous y venez si dou-
cement & ressemblez le tentateur de Iesus
Christ qui est habillé en hermite: mais il a
des griffes en ses mains qui le descourent:
Vous ressemblez Lysander qui disoit que
quand la peau du lyon luy deffailloit, il pre-
noit celle du regnard. Si vous estiez franc
Catholique, & comme ils dient en Angle-
terre, si vous estiez puritain en vostre reli-
gion, diriez vous mal de vostre Pasteur le
Pape de Rome, qui a excommunié celuy
que tant deffendez? L'Eglise ne permet

Replique pour le

point que l'on prie pour les heretiques, & que l'on les frequente: à quoy tend vostre plaidoyé sinon pour admettre ceux qui sont excommuniez de l'Eglise par le Pape nostre Pasteur & Vicair de Dieu en terre? Faiçtes tant enuers le Roy de Nauarre qu'il se conuertisse, & nous nous conuertirons: mais il n'en parle point, au contraire le voila en cāpagne armé & équipé pour en faire autant de tous les Catholiques & bons seruiteurs du Roy, qu'il a fait de feu Monsieur de Ioyeuse & de la Noblesse qui l'accompagnoit, & puis vous ferez d'aduis que nous allissions nous prosterner à ses pieds, vsans de larmes & prieres, sans vser de noz armes que Dieu a mises en la main de nostre Roy pour deffendre son peuple, son hōneur & la foy qu'il nous a preschee & annoncee. Maudit soit-il qui vous croira, au contraire si i'estois bon Orateur (comme à la verité vous estes) i'encouragerois beaucoup de gens qui vous ressemblent, qui ne portent l'espee au costé que pour matiner leurs subiets, d'aller maintenant au secours du Roy, qui a par tant de fois fait proclamer à son de trompe le ban & arriereban de son Royaume, & quand la victoire sera obtenuë, alors nous attacherons noz armes à leurs raste-

liers, & prendrons des heures en la main pour prier Dieu, nous leuerons les mains au Ciel pour nous garder tât des ennemis decouuerts, que couuerts, comme vous qui nous voulez endormir par vostre babil, pendant que noz ennemis voz cōpagnons bandent & amorcent leurs pistolles pour nous massacrer. Si la responce que faictes au Catholique Anglois eust esté faicte deuant que les Reistres fussent entrez en ce royaume à quinze lieuës de Paris, il y auoit quelque apparence, mais la saison n'y est pas. Qui vous feroit de belles remonstrances de prendre garde à vostre maison que le feu n'y print quād le feu est ia tout allumé, & vous retiēdroit à vous en conter, que luy diriez vous, sinon vous estes importun, parlons de l'esteindre, & lors qu'il sera esteint ie vous escouteray volontiers. Le liure du Catholique Anglois est composé il ya deux ans, vous y venez à tard nō receuable, comme disent les pratticiens : il n'est pas temps de demander à vn qui s'est laissé tomber dans vn puits comme il y est tombé: mais il le faut retirer de là, & puis vous sçaurez ce que vous demandez : aussi de s'amuser à disputer de l'Edict du Roy, comme si ce Catholique Anglois l'auoit fait de son autho-

Replique pour le

rité priuée, & ne secourir nostre Roy, qui est en peine pour se deffendre contre les troupes des estrangers qui sont descendus en armes dans son pays, c'est chose à quoy l'on ne se deust employer en ce temps cy, le loisir n'y est point. Je sçay bien que ny les Papes ny les Empereurs n'ont pas trouué bon que l'on forçast les Payens de croire à l'Euangile ny mesmes les Iuifs, & que l'on leur a permis de tenir leurs Synodes: mais par les mesmes autoritez que vous alleguez, cela n'a esté permis aux heretiques apostats, si ce n'est par quelques Empereurs qui vacilloient en la foy. Noz loix punissent de mort celuy qui a violé le corps d'une fille, & vous pardonnerez à vn Ministre qui aura desbauché vostre fils de la foy: Noz loix condamnent à la mort les criminels de leze Maiesté, & vous excuserez le Ministre qui par ses presches aura luscité les huguenots de prendre les armes contre leur Roy: comme si ce n'estoit point autant de sonner la guerre, que la faire?

Or il ne se list point que Dieu du temps de Moyse eut commandé de mettre à mort les Payens qui estoient idolatres, comme il commanda que les Iuifs qui auoient fait le veau d'or, fussent tuez sans remission. La cause

cause estoit que les Payens n'auoient receu les commandemens de Dieu, comme les Iuifs qui auoient apostasié de leur foy. Ainsi les Chrestiens n'ont iamais tenu la rigueur contre les Payés ny les Iuifs, telle qu'ils ont fait contre ceux qui ont renié leur foy: car il seroit meilleur disoit saint Pierre, qu'ils n'eussent iamais cogneu la foy, qu'apres l'auoir cogneuë ils eussent preuariqué. Or les loix sont quelquesfois abrogees, quand l'on congnoist par l'euénement qu'il n'est expedient qu'elles tiennent pour les abuz que l'on commet, aussi nostre Roy qui a cogneu que les Edicts de pacification estoient des vraz boute-feuz & estoient cause de faire damner une infinité de personnes, a eu iuste occasion de les reuocquer, & comme disoit Valerius contre la loy Oppia. Les loix sont muables & reuocables par occasiõ, ainsi que les Medecins changent les remedes, quand ils voyent le patient auoir quelque nouuel accident, & le bon Nautonnier tourne les voiles de son mast selon les vents qui regnent en mer. Vous me direz, mais on voit le fruiet qu'a apporté l'Edict du Roy, c'est que les troubles ont recommencé qui nous ont fait mille & mille maux, ie le confesse: Faut-il toutesfois laisser à faire iustice des

Replique pour le

meschans, pour ce qu'ils pourront se mettre en armes & nous faire la guerre? Faut-il abandonner sa foy sous ombre que les Turcs infidelles nous font la guerre? Si dōc les Turcs venoient en armes contre nous, quitterions nous la cause de Dieu, receuans la loy de Mahomet? alleguer vn inconuenient, ce n'est pas soudre l'argument: si les huguenots estoient inuincibles & estoient si forts que nous n'eussions aucune esperance de les rebouter par armes, ce seroit folie de se perdre. Mais nous deffions nous de la grace de Dieu, a-il pas de la force autāt qu'il auoit quand nous les auons combattuz à Dreux, à Montcontour, & autres lieux où la victoire a cōfirmé nostre religion? Nous ne deuons perdre courage, nostre cause est iuste, nous sommes cēt pour vn, tout le mal est qu'ils sont tous vniz d'un cueur & d'une volonté, nous au contraire sommes desvniz, les vns tenans le party du Roy de Nauarre & du Prince de Condé, sous ombre qu'ils sont Princes du sang, les autres tenans le party des Catholiques, ce qui nous affoiblist: aussi est il qu'ils n'ōt aucun traître avec eux, nous en auons infiniz entre nous: c'est ce qu'appelloient les Hebreux, Gog & Magog, les ennemis couuerts & descou-

uerts, les vns nous oppugnent à enseignes desployees, les autres nous trahissent, faisant semblant d'estre des nostres, ainsi que feist Chrusay, qui feignit d'auoir abandonné le Roy Dauid, pour se retirer vers Absalon qu'il trahit: à la fin, ou bien Zopirus vers les ennemis de son maistre à qui il feist vn bon tour par sa trahison. Or pour monstrier les ruses du diable qui ne cesse de nous enuirôner pour nous deuorer, voyons comme il a procedé iusques icy, & trouuerons qu'il a voulu imiter Dieu, se faisant vne Eglise pour sapper & miner la vraye Eglise: Car premierement il meist l'idolatrie, puis l'heresie, & après l'hipocrisie, pour en fin nous faire tomber en l'atheisme. Si tost que Dieu eust ietté les premiers fondemens de son Eglise, aussi tost le diable en bastit vne autre entre les Payens, où il estoit adoré de sacrifices & encensemens comme Dieu, & ce par toute la terre vniuerselle, fors en Iudée, estant dit, *notus in Iudæa Deus*, encores feist il en sorte que les Iuifs mesmes, qui estoient le peuple esleu de Dieu, tomberent en idolatrie, se fabricquans vn veau d'or. Depuis voyant que son abuz estoit descouvert, & que les Payens se trouuoient adorer des Dieux ridicules, comme Iuppiter qui

Replique pour le

auoit chastré son pere, Mars qui fust surprins en adultere, Ganimedes dont on abusoit, Priapus plein de vergongne, & autres semblables choses lourdement inuen-
tees. Ce que la parolle de Dieu incarnee feist cognoistre. Alors le diable pēsa d'y venir par ruse & astuce, ce fust de susciter des heresies qui se fonderoiēt sur les parolles mesmes de l'Euangile, dont le sens corrompu destruiroit l'intelligence vraye: & de fait dēs le temps des Iuifs il y auoit quatre sectes entr'eux & des heresies, aucuns tenans que Dieu se deuoit adorer au mont de Samarie, les autres en Hierusalem. Et depuis que le Messias fust venu sur terre, iamais l'Eglise n'a esté sans heretiques. Ce que nostre aduersaire a suscité, affin de nous couper la gorge de nostre propre cousteau, & de noz propres armes nous combattre, c'est la zizanie que l'ennemy a sursemé au champ que Dieu auoit semé. Mais quand les heresies ont esté condamnées par les Conciles generaux de l'Eglise esquels Dieu a promis que son saint Esprit presideroit. Lors cest imposteur a persuadé aux siens de se feindre Catholiques pour mieux nous deccuoir & ont dit que les differens que nous auons avec

les Caluinistes n'estoient de consequence, & que les vns & les autres estoient faciles à recôcilier, n'estans en discord que de quelques menuës ceremonies, non des principaux articles de la foy, Côme si les articles de la iustification du sacrement de l'autel de la predestination, & tels autres estoient articles de neant: & pource les Catholiques de ce temps n'ont en horreur les Caluinistes que noz peres ont fait brusler, les reconnoissent Chrestiens, non heretiques: puis qu'ils dient croire le vieil & nouveau testament & le symbole des Apostres. Et d'ailleurs les Caluinistes se dient tenir l'Eglise Catholique & Apostolique, eux qui au parauant tenoient que le Pape estoit le vray Antechrist figuré en l'Apocalipse de saint Iean, le sacrement de l'autel vn idole, nostre Eglise le bordeau spirituel, nous reprouuez, eux les esleuz seuls de Dieu, & pource quād ils rencontroient de noz prestres, ils les faisoient mourir cruellement, abbatoient noz Eglises, fouloient aux pieds nostre Sacrement, & brusloient les reliques de noz saints, à present ils nous veulent familiariser & dient que noz differens sont legers & faciles à accorder, sçachâs bien que si nous nous ioignons à eux, plustost yne pōme pourrie

Replique pour le

en gastera vn millier de saines qu'un millier de saines redra saine vne pomme pourrie: c'est pourquoy nous auons occasion d'euitier leur compagnie ainsi que de gens pestiferez, desquels la contagion corrompt les gens de bien & entiers de religion. Mais scauez vous à quoy tendent ces gens de bonne composition, c'est de nous tirer & les uns & les autres à l'Atheisme: car quand on leur aura confessé que toutes heresies sont religions, on confessera puis apres que toutes religions sont heresies. Et d'autant que les Catholiques zelez fuyent telles compositions de religion que fait Mahomet quand il feist vne fricassée de la Loy Sarrazine & de la Loy des Chrestiens; dont il dressa son Alcoran qui regne encor en vne grande partie de l'vniuers, on les nomme mutins, seditieux, leurs prescheurs sont reputés pour boute-feux & trompettes qui ne cessent de corner la guerre, les Princes Catholiques sont chargez de pretendre la couronne par dessus les Princes du sang, combien que nostre Roy soit en bonne santé, les Parisiens pour sestre obstinez pour le seruice de Dieu & du Roy sont reneuz pour ligueurs, coniuérateurs contre la Maiesté du Roy: bref il n'y a plus de gens fidelles que

ceux qui ne sont en effet, ny Papistes ny huguenots, mais composez des vns & des autres qui ne sont passionnez pour la foy comme chose indifferente, cependant on ne cesse de nous prester des charitez & dit-on que toutes les deuotions, prieres & assemblees que les Catholiques font en leurs Eglises, ce sont monopoles & coniurations secretes contre l'estat, comme si nous n'auions rien à perdre, & que n'eussions point interest de conseruer l'estat aussi bien que ces motifs & adiaphoristes, mais c'est la ruse que le diable a prattiqué de tout temps, que de rendre les esleuz de Dieu suspects de trahison à leurs Princes, qu'il met en deffiance contre leur peuple affin de l'affliger. Pharaon Roy d'Egypte eut les Iuifs en deffiance qu'ils ne se multipliasent & luy fussent rebelles, & pource les tourmenta de toutes les peines qu'il peut excogiter. Assuerus Roy des Medes se deffia des Iuifs & les condamna à la mort pour complaire à son fauory Amon. Daniel fust accusé de crime de leze Maiesté enuers le Roy Darius & condamné d'estre deuoré par les Lyons. Si tost que nostre Seigneur nasquit en ce monde le diable meist en la teste du Roy Herodes qu'il estoit venu pour luy oster sa courōne,

Replique pour le

occafio qu'il feit mourir tous les nouveaux nez, meſmes ſon propre fils, dont Octavius ſe moquant, diſoit qu'il euſt mieux aymé eſtre ſon pourceau que ſon fils, cōme recite Macrobe. Auquel ſ'addreſſe S. Auguſtin diſāt: Il n'eſtoit venu pour amoindrir la gloire d'autruy, mais pour communiquer la ſienne, pour les deſpoüiller de leurs dignitez, mais pour ſouffrir iniures & conuices, nō pour porter vn diademe d'or, mais pour eſtre couronné d'eſpines, non pour eſtre magnifié, mais pour eſtre crucifié: & quand noſtre Seigneur annonça l'Euangile, les Iuiſ ſuy obieſtoiēt qu'il deſſedoit de payer le tribut à Cæſar, pour le rendre odieux à luy, & n'eurent plus fort argument à le faire mourir que de dire qu'il ſ'eſtoit voulu faire Roy. Les Apoſtres & leurs ſucceſſeurs ont eſté deferez aux Empereurs, cōme cōſpirateurs faiſant aſſemblees illicites, ainſi qu'eſcrit Pline en ſon Epiſtre à Traiā, Juſtin en ſon Apologie, Tertullian en ſon Apologetique: Et quand quelque malheur eſtoit ſuruenü aux Romains on en chargeoit les Chreſtiens: comme quand le feu bruſſa la ville de Rome, Neron priſt occaſion de faire mourir les Chreſtiens, quand la ville de Rome fuſt priſe & ſaccagee par les Gots, on

en

en ietta l'occasion sur les Chrestiens, qui fut le subiet à saint Augustin d'escrire son liure de la Cité de Dieu. Saint Cyprian se plaint de Demetrianus, qui attribuoit la peste, la famine & la guerre aux Chrestiens. On se plaint des maux de la guerre prouvenuz pour la ligue, mais qui a suscité la ligue que l'heresie? Nous faisons comme si nous offensons des Chirurgiens qui couperoient la iambe à nostre amy & ne scaurions point mauuais gré à celuy qui luy auroit baillé vn coup de pistolle, pour lequel il seroit de necessité luy couper la iambe. De nostre temps pour ce que la terre & les vignes n'ont pas rendu comme parauant, on a dit, voila l'effect de la ligue, toutesfois les vignes ont failly par tout, comme il est notoire. Ces deffiances ont ligué & contre-ligué nöz citoyens de Paris, aucuns faisans courir le bruit que l'on vouloit faire vne saint Barthelemy des politiques & des plus gros de la ville, où on n'auoit iamais pensé, comme l'euenement l'a demonsté: car combien que les Catholiques ayent deliberé de mettre leurs biens & leurs vies pour la conseruation de leur religion, toutesfois iusques icy ils n'ont fait aucun meurtre, aucune sedition, ny aucune force: mes-

Replique pour le

mes quand ils ont trouué en leur ville des gens de la pretéduë religion & qui auoient esté en l'armee des ennemis, ils ne les ont tuez ny pillez, mais les ont mis entre les mains de la Iustice: Toutesfois ils sont sans cesse calomniez: Mais ils esperent que Dieu les en deliurera & fera congnoistre leur intention estre plustost d'espandre leur propre sang pour maintenir leur foy, qu'espandre le sang d'autrui. Que si on se deffie d'eux, que l'on se mette de leur ligue pour sçauoir si leur intention est autre que bonne, & pour les deferer & conuaincre d'estre monopoleurs: mais ils ont ce malheur sans que l'on s'enquiere si leur ligue est bõne ou mauuaise, & ce qu'elle pretend, ils sont condamnez auant qu'on leur face leur procès: C'est ce dõt Tertullian se plaint que les Emperours de Rome condamnoient le nom seul des Chrestiens, sans s'enquerir s'ils estoient larrons, adulteres ou meurdriers, le nom seul les faisoit reputer pour meschans, aussi maintenant qui est nommé ligueur, c'est à dire vn meschant homme ennemy du repos public, nostre nom est tiré à enuie, on reprend nostre nom seul tant nostre vie est innocente. Or face le diable, c'est à dire le calomniateur, tous ses efforts con-

tre l'Eglise de Dieu, elle sera maintenue par
celuy qui l'a fondée & bastie, contre laquel-
le les portes d'enfer ne pourront preualoir.
Si nostre Roy auoit déclaré ceux de la ligue
ses ennemis, s'il les auoit desaduouiez &
condamnez comme criminels de leze Ma-
iesté, j'auroy tort de les fauoriser, & serois
mauuais seruiteur du Roy, mais moy qui
n'entre point au cabinet de ses affaires se-
crettes, que puis-je iuger de son intention,
voyant qu'inclinant à la requeste de ceux
de la ligue il a reuocqué les Edicts de pacifi-
cation, a banny les huguenots de ses terres,
a enuoyé vne armee en Guyenne sous
Monsieur le Duc du Mayne, a fait pro-
clamer sa gendarmerie en assignant vne
bonne partie sous le commandement de
Monsieur de Guyse, voyant que ceux qui
ont fait la ligue sont souuent aupres de sa
Maiesté. Iusques à ce qu'il me soit appar-
qu'ils soient ennemis du Roy, ie demeure-
ray en la possession où nos peres nous ont
laissé de louer la maison de Guyse & blas-
mer les huguenots. Et si ie scauois que ceux
de la ligue, ne fussent poussez du zele de la
religiõ, mais d'une ambition, ie proteste en
ma consciẽce que ie les detesterois comme
hypocrites & doubles en cuer, encores

Replique pour le

qu'il y en ait qu'ils dient qu'il se faut seruir de ceste ambition pour exterminer noz ennemis, & que quand la victoire sera obtenüe; alors si ceux de la ligue veulent attenter à l'Estat, il se faut opposer à eux, & qu'il sera lors assez temps de chastier leur ambition. Mais ie ne puis que ie ne me pleigne de ceux qui nous veulent desgouster des Medecins & Chirurgiens que nous auons durant la maladie où nous sommes à present, & qui par leurs belles parolles destournent plusieurs, mesmes aucuns Princes du sang, de faire le seruice au Roy qu'ils sont tenuz & obligez de faire, leur ayant persuadé de se retirer au camp de l'ennemy où d'entree ils sont arraché le signe de la croix qu'ils portoient en leurs habits par vn vœu & serment solemnellement presté: mais le diable veoit fort mal volontiers ces signes salutaires qui sont les anciēnes armes des Chrestiens. Et quand le Catholique Anglois en son liure a parlé de la fleur de lys qui est de mauuaise odeur à Dieu, & s'est flaitrie, il n'a iamais entendu des bons Princes du sang, comme de Monsieur le Cardinal de Bourbon qui a pris pour sa deuise *folium eius non defluet*, ou de nostre Roy qui conserne ceste fleur toute aussi belle & fraische que le

Roy saint Loys luy a laissée: ce sont fleurs incontaminees, blâches & bien odorantes, non celles qui se desseichent d'enuie & de ialousie, comme le visage de Cain, voyant les sacrifices de son frere estre plus aggreables à Dieu que les siens, & pource machina la mort de son frere. Voila les effets de voz belles remonstrances; messieurs les metifs, qui semez des dissentions entre les freres, ce que Dieu abhorre sur tout, ainsi que tesmoigne Salomon. Valloit-il pas mieux les exhorter à suiure la lumiere de France, cōme les autres de leur maison qui n'ont decliné ny fouruoyé de leur religiō. Vous detorquēzen mal ce qui a esté dit de messieurs les Cardinaux qui sont vestuz de rouge, non pour le exciter à espādre le sang d'autrui, mais exposer leur sang propre, pour la deffence de la foy, & vous cependant que l'ennemy est à noz portes vous faites comme ce Sinon de Virgile qui par ces saintes larmes & parolles desguisees, persuadé aux Troyens de recevoir dans leur ville ce cheual de bois dans lequel estoient cachez ceux qui leur couperent la gorge, & surprindrent leur ville. Vous nous preschez de recevoir les heretiques, nous deffaire de la ligue qui deffend noz murailles, vous semez des noi-

Replique pour le

ses, & diffentions entre nous & y iettez la pomme de discorde, affin de nous amuser à nous contredire l'un l'autre, cependant que l'ennemy eschelle nostre ville & s'aperoiz murs, vous nous liez les mains de peur que nous nous deffendions de ceux qui cherchent nostre mort. Vous ressemblez Iules Cesar qui sourdement fauorisoit l'entrepri-
se de Catinila, lequel preschoit la misericorde au Senat lors qu'il estoit question de cōdamner sa cōiuration, vous estes misericordieux aux huguenots & cruel à ceux de la ligue & puis que la guerre est ouuerte entre les deux partis, que ne vous rangez vous à l'un ou à l'autre : ainsi que la loy de Solon nous conseille. Mais vous faites cōme Metius Sufferius, vous attendez de quel costé tōbera la victoire pour vous ioindre au victorieux. Mais aussi gardez vous qu'il ne vous en preigne cōme à luy qui fut escarté en deux parts cōme traistre à l'un & à l'autre. Nostre Roy ne vous sçaura point de gré d'auoir desbauché de son seruice ses parens, ses subiets & ceux qu'il a si souuent semons & conuoquez à son aide & secours par ses mandemens & ordonnances. Et quād le Roy se sera declaré contre la ligue, que le Pape les aura excommuniez, il sera temps

d'escire contr'eux, de leur faire la guerre & par les armes & par la plume, ie seray lors des vostres, mais iusques à là excusez moy si ie tiens le party de ceux qui fauorisent ma religion.

F I N.

Handwritten text, likely bleed-through from the reverse side of the page. The text is faint and mostly illegible due to fading and the texture of the paper.

Handwritten text, possibly a signature or a date, located in the center of the page. It is also faint and difficult to decipher.

Handwritten text in the upper right corner of the page, appearing to be a date or a reference number.















